

Kuntri Nani Asla Takanka

Aipaswanka Daknika

Mitin nani Daukanka Numba 61
Upla Raitka nani Tâ Brabrira Aslika Riputka

Alemania, Bélgica; Bolivia, Costa Rica, Cuba, Dinamarca, Ecuador, Eslovenia, España, Estonia, Finlandia, Grecia, Guatemala, Hungría, Letonia, Nicaragua, Perú, Portugal bara República Dominicana: Lâ Bapanka Proyektoka

Kuntri Nani Asla Takanka Indian Uplika nani Raitka dukiara Lâ ulbi Sakanka daukan ba

Aipaswanka Daknika ba:

Lukanka saki Upla Raitka nani Tâ Briaika Daknika lâ ulbi sakanka ½ ra kupia krauki ba wina, baha lika lî kati lapta 29, 2006 manka ra sakan ba, baha wal sika Tâ Briaika Daknika bui Kuntri Nani Asla Takanka ulbanka bapan kata ba ra âu pain win, baha lika Upla nani Raitka dukiara aisi kata ba.

Ai kupia krauki lâ ulbi sakanka numba 61478, trisu kati lapta 20, 2006 manka ra sakan ba, baha wal wilin takan ba laki kaikanka ba yu wala daukaia bara Lâ ulbi Sakanka dukiara bapanka nani mangkan ba alki briaia, bara baku lika kau taim bri kaia baha tânka kau pliki kaiki kaia, bara baku sin wilin takan Lâ ulbi Sakanka laki kaikanka ba tnata mangkaia mitin nani daukanka numba 61 ba kau tnata alkras ba ra.

Âuka ba yabisa Kuntri nani Asla Takanka Lâ ulbi Sakanka daukan ba indian uplika nani Raitka dukiara, baha sika naha ulbanka marikuya na ra ulbi sakuya na.

Tnaya ra Prakanka

Kuntri nani Asla Takanka Indian Uplika nani Raitka dukiara Lâ ulbi Sakanka daukan ba

Aipaswanka Daknika ba.

Lukanka brih ki Kuntri nani Asla Takanka Ulbanka Tara tilara bapanka nani bara lukanka nani bri ba, bara baku sin Gabamint nani baha Ulbanka Tara ra dîa pramiska nani bara blestu lâka nani kulkanka dukiara lukanka yamni brin ba.

Kasak aisi indian uplika nani ba kiamka nani wal sim baku kulkanka brisa bara sim piua ra latan kaiki upla nani sut raitka ba yabaia sa ai tânka sât wala bri kaia bara witin nani silp upla sât wala baku ai wîna ra kulkaia bara baku kabia sin, blestu kulkanka yaban kaia sa.

Baku sin kasak aisi upla kiamka nani sut bui hilpka yabisa sinska lâka nani bara natka nani sât sât bri kaia dukiara, kan baha sika tasba aiska uplika nani ai prapatika baku bri ba.

Baha purkara kasak aisi smalkanka nani sut ba, pulitik bisniska bara praptiska nani dakni nani o upla kum kum kau karnika brisa wisi ai dara wali ba ra, apia kaka baha lukanka buki banhwi ba ai tawanka o kiamka nani sât wala ba ra kaiki, baku sin kristian, indian tânka o ai natka nani baku ra kaiki, baha nani ba kiamka wala ra kulkanka yabras sa, natka tihu ra kuninkira atia bara lâ natka kat sin bahki baman sa, ai daukanka saura mita yamni apia kulkaia sa bara upla ra saura mamunra nani baku sin.

Kau karna aisi, ai raitka nani alki daukanka tilara, indian uplika nani ba pri lâka bri kaia sa saura kulkanka sât sât ba tila wina.

Kasak pali luki indian kiamka nani ba blasi piua wina saura munan lâka tilara sa, baha sika bal takan saurka sât sât wina, wibia kaka tasba wala wina bal dimi taiban lâka ra ai tasbaya tara nani dakbi brin ba, baku sin ai tasbaika pîs sirpi nani bara ai ritska nani, baha sut mita munan sip ai warkka pain daukras, kau pali lika pâwanka lâka briaia ai raitka bri ba, baha sut ba silp ai nitka bara ai brinka nani tânka kat.

Wan dara pain wali istikira nitka bâra sa indian kiamka nani upla baku ai raitka nani bri ba rispik munaia bara kakaira sakaia, baha nani sika bal takisa ai pulitikka patrangka nani wina, baku sin lalah bisniska, upla baku ai trabilka bri ba, ai natka nani bara spirit tani ra blasi piua wina bri ba, baku sin ai sturka bara rayaka dukiara dîa lukanka bri ba, kau pali lika ai tasbaya nani bri kaia raitka, ai tasbaika pîska sirpi nani bara ai ritska nani kat.

Baku sin wan dara pain wali indian kiamka nani raitka nani ba nit pali sa rispik munaia bara kakaira sakaia, baha sika bapan ba triti lâka nani wal, baku sin pana pana lâ bapanka nani bara aisanka wala nani Gabamint nani aikuki daukan ba.

Lilia wan dara wali indian kiamka nani ba asla taki banhwisa pulitik natka ra, baku sin lalah, upla baku bara ai iwanka natka ra pâwanka briaia dukiara, bamna ani anira kulkanka âpu tânka bara taiban lâka takbia ba tnata alkaia mata.

Kasak wan dara wali indian kiamka nani ra diara nani taki ba wal ai tasbaya nani, ai tasbaika pîska nani ra bara ai ritska nani ba ai mihta ra alki bri banhwisa, bara baha wal sip kabia ai aslika takanka nani ba, ai iwanka natka nani bara blasi piua wina ai daukanka nani bri ba ban alki dauki kaia, bara ai pâwanka lâka ba bukaia, dîa ai brinka nani bara ai nitka nani bri ba tânka kat.

Wan dara wali sinska lâka nani ra bara iwanka natka nani ra rispik munaia ba, bara blasi piua wina indian kiamka nani ai daukanka nani bri ba mita yaban lâ kat bara alsut ra pâwanka lâka yabisa bara baku sin ai kaina kir iwi pliska ra tânka kat dauki bri kaia.

Kulkanka tara yabi indian kiamka nani tasbaya bara tasbaika pîska nani ra “militar” lâka tiki auya ba mita laman lâka, pâwanka bara lalah tani ra an ai uplika nani ra tara taki ba, baku sin kuntri nani bara tasba aiska nisanka nani aikuki tânka pain bara pâna lâka bri ba.

Kau pali tânka brih indian tawanka nani bara ai pamalika nani raitka ba, bara ban bakahnu wan pahpaya purara bri kaia ai luhpia nani pakaia, sinska lâka, skul sinska bara yamnika lâka warkka ba, baha sut lika tuktan nani raitka ra kulkanka yabi.

Wan dara wali triti lâka nani, pana pana lâ bapanka nani bara lâ kasakkira wala nani Gabamint nani wihki indian kiamka nani wal aisi daukan ba, baha nani lika natka kum kum ra trabil taki lukaia dukiara auya, baku sin kuntri nani tilara kasak kulkanka yabaia bara pahpaya purara sin wirhka ba kahbisa, bara baha nani lika blestu kuntri nani sut tilara daukan kaia sa.

Baku sin wan dara wali triti lâka nani, pana pana lâ bapanka nani bara lâ kasakkira wala nani, bara naha nani wal tânka mariki ba mita ai putka baku brisa indian kiamka nani wihki Gabamint nani wal asla ai maisa wilkanka briaia ba.

Tânka brih Kuntri nani Asla Takanka Ulbanka Tara ba, Kuntri nani wal Pramis Lâka daukan ba Lalah tani ra, Upla bara Iwanka Natka Raitka nani ba, baku sin Kuntri nani wal Pramis Lâka daukan ba Upla baku bara Pulitik Raitka nani tânka kat, bara sim baku Viena tawanka ra Aisanka Tara bara Wark Daukanka Programka Param Sakanka ba, baha sut bui bapanka tara kum daukisa upla kiamka nani sut ba ai raitka brisa silp nahki iwan dauki ba bapaia, bara baha tâka mita naha nani silp ai lâka pri pali bapisa ai pulitik bisniska ba bara pri pali nina bliki banhwisa ai pâwanka lâka ba briaia lalah, upla baku bara ai iwanka natka tani ra.

Pain wan tânka brih naha Ulbanka Tara ra mangkan tânka nani ba sip yus munan kabia apia upla kiamka kumi ra sin pri lâka ra dîa sât natka ra iwan dauki ba raitka yabaia apia dukiara, baha sika alki dauki ba kuntri nani tilara raitka bâra ba natka kat.

Kasak wan dara wali naha Ulbanka Tara ra indian kiamka nani raitka ra kulkanka yabi ba mita Gabamint nani wihki indian kiamka nani wal pâna baku bara tâ baikanka natka ba kau daukan kabia, baha lika upla nani raitka kat kasakka lâka, tawan uplika karnika bara rispik lâka bapanka nani ba kat kaiki, baku sin saura kulkanka yabaia apia bara lukanka yamni sin bri kaia.

Kasak mariki Kuntri nani Asla Takanka mihta ra sa piua bani bara takaskras kira ai warkka daukaia sa indian kiamka nani raitka tâwan nikbanka bara tâ baikanka dauki kaia sa.

Pain wan tânka brih naha Ulbanka Tara na lika mina lulkanka tara kum sa indian kiamka nani raitka ba tâura brih waia bara kaina kahbanka warkka ba kau kulkanka yabaia dukiara, bara baku sin naha tani ra Kuntri nani Asla Takanka ai natka bri ba tilara wark nani ba daukan kaia sa.

Tânka brih bara kau karna aisi indian uplika nani ba upla raitka nani sut ba bri kaia ai raitka brisa, baha sika kuntri nani sut tilara kulkanka tara yabi ba, bara indian kiamka nani ba ai daknika kat ai raitka nani brisa, bamna baha nani sika nit pali sa witin nani ba upla daknika baku raya iwi kaia, yamnika lâka bara pâwanka sin bri kaia.

Baku sin tânka brih indian kiamka nani tânka nahki ba sât sât sa, baha lika ani tasbaika pîska nani bara kuntrika nani ra iwi ba ra laki kaiki, bara pain laki kaikan kaia sa kuntri nani bara tasba baiki sakanka nani ra nahki tânka ra iwi banhwi ba, bara baku sin sturi bara iwanka natka nani blasi piua wina bri ba sin laki kaikan kaia sa.

Kulkanka tara wal sakuya Kuntri nani Asla Takanka Ulbanka Tara na indian kiamka nani raitka dukiara, baha ulbanka pali sika naha ningkara ulbuya, upla sut lukanka kumi baku bri kaia dukiara, bamna alki daukan kaia sa wan uplika pali spiritka ra bara pana pana rispikka lâka wal.

Ulbanka 1

Indian nani ba ai raitka brisa, kiamka nani bara upla nani baku, upla raitka nani bara pri lâka natka sut ba sin blestu briaia sa, baha bapanka nani sika Kuntri nani Asla Takanka Ulbanka Tara ra ulbi tânka marikan sa, baku sin aisan sa Upla Raitka nani Param Marikanka Tasba aiska ra kulkbia wisi ulbi swin ba, bara sim baku kuntri bani upla raitka nani yabia wisi lâ nani bâra ba tilara.

Ulbanka 2

Indian uplika nani bara kiamka nani ba lika pri atia bara sim sât sa tasba ra upla wala nani bara kiamka nani wal baku, bara ai raitka bri banhwisa ai raitka nani sut dauki ba tilara saura kulkanka briaia apia, baha sim dukia sika ai playa bri ba indian baku bara witin upla baku ai tânka bri ba natka kat.

Ulbanka 3

Indian kiamka nani ba ai raitka brisa dîa sât ai iwanka ba briaia pri pali natka ra. Baha raitka bri ba kat kaiki, witin nani dîa sât pulitik lâka ra iwaia ba pri pali sa, bara sin pri lâka wal lalah tani ra, upla baku bara ai iwanka natka ra pâwanka briaia sa.

Ulbanka 4

Indian kiamka nani ba, pri lâka ra dîa sât ai iwanka ba brin daukanka tilara, ai raitka bri banhwisa klauna lâka bara silp ai gabamintka briaia, baha lika silp ai bisniska nani bara ai uplika tilara dîa trabilka bri ba tânka kat, bara baku sin natka sât sât yus munaia ai warkka nani klauna lâka ba lalah wal daukaia.

Ulbanka 5

1. Indian kiamka nani ba ai raitka brisa naha dukia tânka nani na alki bri kaia bara karna sin daukaia: silp ai asla takanka nani pulitik tani ra, ai lâka nani, lalah tani ra, upla baku bara ai iwanka natka kat sin, bara sim taimka ra, witin nani brin daukisa kaka, ai raitka lâka aiska wal wilinkira dimaia, baku sin pulitik, lalah bisniska, upla baku bara Gabamint ai iwanka natka bri ba rayaka tilara.

2. Indian kiamka nani ba ai uplika nani tila kat alsut pri lâka, laman lâka bara trabil âpu iwaia ai raitka bri banhwisa, upla nani sât wala baku; bamna witin nani ba iki tikanka bara rau sauhkanka sâtka kumi ra sin dingkan kabia apia, baha tilara sin dingki ai daknika tila wina taiban natka ra tuktan nani ba dakni wala ra brih waia apia.

Ulbanka 8

1. Indian kiamka nani bara uplika nani ba ai raitka bri banhwisa ai iwanka natka ba sauhki tikan kaia apia bara natka wala nani sin taibi munka alki briaia apia.

2. Gabamint nani ba natka kasakkira nani bapbia yaka takaia apia bara saura munan tâwan yamnika yabanka dukiara:

- a)** Daukanka bani wina indian kiamka bara uplika nani ra ai kulkanka bri ba yabaia apia o dakbaia lukanka bâra kabia kaka, baha lika upla nani sât wala baku kulkanka yabras ba o ai iwanka natka nani o indian kiamka baku ai raitka bri ba yabras kaia ba.
- b)** Daukanka bani wina lukanka bâra kabia kaka ai tasbaya nani mihta dakbaia, baku sin ai tasbaika pîska nani o ai ritska nani ba.
- c)** Upla nani taiban natka ra pliska wina saki plis wala ra brih waia sâtka bani ba, baha wal bal takaia sip ba ai raitka nani kum kum kulkanka yabras o daukras kaia ba.
- d)** Diara kum ra ai brinka âpu dimaia o taiban lâka ra yaka daukaia ba.
- e)** Sturi bukanka sât sât daukaia ba, bara baha tâka mita witin nani mapara kiamka bara indian baku kulkanka yabras kaia tânka ba.

Ulbanka 9

Indian kiamka bara uplika nani ba ai raitka brisa indian aslika kum o nisanka kum tilara kaia, baha lika ani tawanka o nisanka uplika ai iwanka tânka bara blasi piua wina ai natka nani bri ba lâka kat. Baha raitka bri ba alki daukaia ba wina saura kulkanka kumi sin bal takaia apia sa.

Ulbanka 10

Indian kiamka nani ba taiban natka ra ai tasbaya nani bara ai tasbaika pîska nani wina sakan kabia apia. Plis kumi ra sin sakan kabia apia indian kiamka

nani ai brinka aiska, kaina manis wina maisa pakras bara pri pali sin makabras kaka, baku sin ban kra sâkbia mana lalah aitani bara lâ kat aibapaia wiras kaka, bara piua bani sin sip kabia ai pliska ra kli tawi balaia.

Ulbanka 11

1. Indian kiamka nani ba ai raitka brisa blasi piua wina ai daukanka nani bara ai iwanka natka nani ba kli raya bukaia. Baha tilara bâra sa ai raitka bri ba marikanka nani piua luan ra, naha taimka ra bara naika piua ra bribia ba sin ban alki bri kaia bara kaina kahbaia sin, wibia kaka sturi tara bara almukka dukia bri pliska nani ba, yus muni dukia nani, paskanka patrangka nani, pura sunra daukaia natka nani, sinska lâka nani, wan nakra ni kaiki dukia pranakira nani bara tânka saki marikaia dukia nani bara ulbanka dukia nani sin.
2. Gabamint nani bui kulkanka tara natka nani yabia wark yamni kasak nani wal, baha tilara dingkaia sip sa kli laki yabanka ba, indian kiamka nani aikuki bapanka daukan ba, yamnika lâka nani iwanka natka ra, sins lâka, kasak lukanka bara spirit tani ra sin witin nani mihta dakban baku ba ai lukanka pri pali bri kan ba adarka âpu, kaina manis wina maisa pakras daukan ba, apia kaka ai lâka nani, blasi piua wina ai daukanka nani bara ai natka nani bri kan ba ra saura pali muni.

Ulbanka 12

1. Indian kiamka nani ai raitka brisa blasi piua wina ai daukanka nani bri ba, ai iwanka natka nani, spirit tani ra ai daukanka nani bara ai pura sunra natka nani ba param marikaia, alki dauki kaia, pâwanka yabaia bara smalki kaia; baku sin spirit tani ra bara ai iwanka natka pliska nani bri ba pain bri kaia bara kaina kahbaia bara lâ ba kat sin baha nani ra dimaia; ai priaska dukia nani ba yus munaia bara pura pain main kaiki bri kaia bara upla pruan dusa nani plis wala ra ba sin yaka kli bri balaia ai tawanka nani ra.
2. Gabamint nani ba trai munbia prias daukaia dukia nani bara upla pruan dusa nani bri kaka, yaka kli pliska ra bri balaia, baha lika natka nani kasakkira, klin bara rait aihwa sâtka nani, baha nani lika asla indian kiamka nani wal lâ bapan bara baku brin dauki banhwi ba.

Ulbanka 13

1. Indian kiamka nani ba ai raitka brisa ai kiamka nani naika takbia ba dukiara ai sturka nani, ai bîla aisanka nani, blasi piua wina aisi aula dukia nani ba, sins tihu tânka nani, nahki ulbaia natka nani bara ulbanka sâtka nani ba yaka kli karnika briaia, yus munaia, yaka kakaira takaia bara pakaia sin, bara ai tawanka nani ra, ai pliska nani bara upla nani ra sin nina yabaia bara baha nani ba ban bri kaia.
2. Gabamint nani ba lâ pain nani bapbia baha raitka ba kaina kahbi bara yaka daukaia dukiaran bara yaka indian kiamka nani ba tânka briaia sip

kabia bara pana sin ai tânka briaia sip kabia pulitik daukanka nani tilara, lâ sâtka nani bara nahki wark daukaia natka nani ra, baha dukiara yabi kabia, nitka bâra kabia taim, ai bîla kat laki yabanka nani o natka wala pain nani sin.

Ulbanka 14

1. Indian kiamka nani ba ai raitka brisa skul smalkanka bara sinska yabanka natka nani bri ba sut bapaia bara pura kaiki kaia, baha nani lika silp ai bîla kat dauki ba, dîa smalkanka bara lan taskanka natka nani bri ba tânka kat.

2. Indian uplika nani ba, kau pali lika indian tuktika nani ba, ai raitka brisa Gabamint skulka nani ra dimaia manka ulanka bara lâka nani bapan ba kat, saura kulkanka kumi sin âpu kira.

3. Gabamint nani ba natka kasakkira nani bapbia, indian kiamka nani aikuki, bara baku mika indian uplika nani ba, kau pali lika tuktan nani ba, baha tilara dingki ai tawanka nani wina sait ra iwi banhwi ba, dimaia sip kabia, ani piua ra sip kabia taim, skul sinska briaia ai iwanka natka bara silp ai yapti bîla kat.

Ulbanka 15

1. Indian kiamka nani ba ai raitka brisa ai iwanka natka nani, blasi piua wina ai daukanka nani ba, ai sturka nani bara ai brinka nani sâtka manis ra bri ba bara kulkanka tara bri ba sin, gabamint skul smalkanka bri ba tilara bara upla ra kakaira saki natka nani ra sin kasak pali ulbi swin kabia.

2. Gabamint nani ba natka kasakkira nani bapbia, indian kiamka nani ai brinka bri ba aikuki aisanka brih bara asla wark taki muni, lukanka yamni apia nani ba bara saura kulkanka lâka ba mapara aiklabaia dukiara, bara pana pana rispik lâka, tânka brinka bara aikuki pain iwi kaia ba natka kat, baha lika indian kiamka nani wihki upla sâtka wala nani sut aikuki.

Ulbanka 16

1. Indian kiamka nani ba ai raitka brisa silp sturi sakaia natka nani bri kaia silp ai yapti bîla kat, bara sim baku indian sturka saki dukia nani sut ra dimaia sip kaia, saura kulkamka sâtka kumi sin âpu kira.

2. Gabamint nani ba natka kasakkira nani bapbia upla ra sturi saki mariki natka nani ba lâ ba kat indian iwanka natka sâtka manis ba aitani kat saki banhbia dukiara. Gabamint nani ba, pri pali sturi sakaia blestu ba ra saura munanka âpu kira, upla nani silp ai sturka sakaia dukia nani bri ba ra spiritka bukaia sa indian iwanka natka sât sât ba aitani kat mariki banhbia dukiara.

Ulbanka 17

1. Indian kiamka bara uplika nani ba ai raitka brisa kuntri bilara bara kuntri nani tilara wark raitka nani bapi bri ba witin nani sin aiska pali hilpka briaia.

2. Gabamint nani ba, indian kiamka nani wal aisi bara tâ baikanka wal, natka aihwa nani bapbia indian tuknika nani kaina kahbaia dukiara, baha lika lalah tani ra taibanka bara wark bani trabilkira kaia sip ba, apia kaka tuktan ra sinska lâka wina kau mayara ba, apia kaka wina tara mapa ra o pâwanka tani ra, sinska, lukanka o upla baku ba mapara saura kaia sip ba, bara pain ai dara wali tuktan lika swapnikira sa bara nahki skul sinska nit ba ai raitka nani aiska ba alki dauki kaia dukiara.

3. Indian uplika nani ba ai raitka brisa wark karna yabi tilara kulkanka âpu natka ra dingkaia apia, wibia kaka diara wala nani tilara, wark o mana aibapanka.

Ulbanka 18

Indian kiamka nani ba ai raitka brisa tilara dimi ai raitka nani bisniska dukiara aisi kaikanka nani daukbia ba ra sturi sisaia, baha lika witin nani bui ai tâ uplika nani wahbi sâkbia ba silp ai natka nani daukanka bâk, bara baku sin silp ai aslika nani ban bri kaia dîa daukaia ba tânka nani pliki kaiki muni pâwanka lâka briaia mata.

Ulbanka 19

Gabamint nani ba indian kiamka nani ai brinka bri nani ba aikuki lukanka yamni brih ki aisi kaikanka nani daukbia bakahnu natka ra, baha lika ai asla takanka nani wahbi sakan ba wal, baha ba lâ bapanka nani bara nahki wark daukaia natka nani lâka bapaia bara daukaia kainara, baha nani mita sika witin nani ra kangbaia sip ba, bara baku lika pri natka ra bara kaina manis wina pri pali pat ai lukanka aitani yaban kaia.

Ulbanka 20

1. Indian kiamka nani ba ai raitka brisa asla takanka nani bri kaia bara yaka pâwaia sin pulitik tani ra, lalah bara upla baku kaia, baku sin silp raya iwi kaia bara pâwanka lâka natka nani ba yaka pain kaia mata, bara pri pali blasi piua wina ai natka nani bara sâtka wala nani bri ba sut pri pali dauki kaia.

2. Indian kiamka nani ai rayaka brih iwi kaia natka nani bara pâwanka lâka natka nani ai mihta dakban ba, ai raitka bri banhwisa lâ aihwa tânka ba kat tâ baikanka brin kaia.

Ulbanka 21

1. Indian kiamka nani ba ai raitka brisa, saura munanka kumi sin âpu kira, lalah tani ra bara upla baku ai iwanka bri ba kau yamni daukan kaia, wibia kaka diara wala nani tilara naha nani baku: skul sinska, wark bri kaia, diara daukaia sinska yabanka, wark sâtka tara nani dukiara smalkanka, dimaia watla, tâski âpu warkka, wina tara yamnika bara upla baku pain iwi kaia ba.

2. Gabamint nani bui natka kasakkira nani bapbia, bara mahka daukbia taim, natka yamni nani kaia, baha wal indian nani ba lalah tani ra bara upla baku

iwaia ba piua bani dauki yaban kabia. Kau laki kaiki hilpka daukan kabia indian dama bara kuka nani, mairin nani, wahma an tiara nani, tuktan nani bara skahwa uplika nani ra sin.

Ulbanka 22

1. Dama bara kuka nani, mairin nani, wahma an tiara nani, tuktan nani bara upla skahwa nani raitka nani ra kau kulkanka yaban kabia naha Lâka Ulbi Sakanka na mahka daukbia taim.

2. Gabamint nani ba indian kiamka nani wal lâ mangki banhbia, mairin bara tuktan indian nani ba kaina kahbanka bara kulkanka tara bri kabia dukiara, baha lika saurka lâka bara bahki kulkanka natka sât sât wina.

Ulbanka 23

Indian kiamka nani ba ai raitka brisa pâwanka lâka briaia bara dauki kaia dukiara natka nani bara kau nitka dukia nani ba ulbi saki mangkaia. Kau pali, indian kiamka nani ba ai raitka brisa wark sât sât nani tânka pliki bara paskuya ba tilara dimaia, wibia kaka wîna tara yamnika, utla briaia, lalah tani ra bara upla baku iwaia programka nani witin nani ai dukia pali ba, bara sip kaka sin baha programka nani ai mihta ra brih ki tâura brih waia, silp ai asla takanka nani aikuki.

Ulbanka 24

1. Indian kiamka nani ba ai raitka brisa blasi piua wina silp ai saika nani kakaira ba bara wîna tara yamnika warkka nani ba sin ban dauki kaia, baha tilara dingki ai inmika wahia nani, daiwan nani bara tasba munhta dukia nani nitka tara bri dukia nani ba rawaia natka kat kaiki. Baku sin indian uplika nani ba ai raitka brisa pliki briaia, kulkanka saura kumi sin âpu kira, upla baku bara wîna tara yamnika hilpka nani sut ba briaia.
2. Indian uplika nani ba ai raitka brisa upla wala nani bri ba baku, wîna tara bara sinska tani ra hilpka lâka sât sât ba briaia. Gabamint nani ba natka nani bapbia nit banhwi kabia dukiara bara baku mika tawa tawa baha raitka nani ba ai mihta ra alki waia.

Ulbanka 25

Indian kiamka nani ba ai raitka brisa spirit tani ra ai tânka bri ba ban dauki kaia bara karna sin daukaia, baha sika tasba nani bri ba wal, ai tasbaika pîska nani, lî nani, kabu un nani ba bara ritska wala nani blasi piua wina ai dukia baku bri ba, ai tasbaika ra ba bara natka wala ra yus munan ba, bara ai pahpaya purara dîa warkka nani daukaia bri ba twilkaia, baha lika kiamka nani wan tâura aula ba hilpka dukiara.

Ulbanka 26

1. Indian kiamka nani ba ai raitka brisa ai tasbaya nani bri kaia, baku sin ai tasbaika pîska nani bara ritska sât sât nani blasi piua wina ai dukia baku bri ba, hilpka brin o natka wala ra yus munan o bri banhwan ba.
2. Indian kiamka nani ba ai raitka brisa dawanka takaia, yus munaia, yaka pâwaia bara lâ kat yus muni kaia, wibia kaka ai tasbaya nani bara ai ritska nani bri ba blasi piua wina ai prapatika baku, apia kaka blasi piua wina natka wala ra bri ba o yus muni ba, baku sin wala nani natka wala wina ai dukia baku brin ba.
3. Gabamint nani ba kasak pali naha tasbaya nani, tasbaika pîska nani bara ritska nani lâ kat ai dukia kaia kulkanka bara kaina kahbanka ba sin yabia. Baha kulkanka tara ba mita kasak pali rispik munbia iwanka natka nani ba, blasi piua wina daukanka nani bri ba bara nahki natka ra indian kiamka nani dukiara aisi ba ai tasbaika bri banhwi ba tânka.

Ulbanka 27

Gabamint nani ba lâ nani bapbia bara sin daukbia, indian kiamka nani ai brinka bri ba aikuki, wark kum wal baku natka ra, silp ai dukia baku, upla kumi ra sin driwras kira, param bara klin pali, bara baha wal aitani kat param mariki banhbia indian kiamka nani lâka nani, blasi piua wina daukanka nani, iwanka natka nani bara nahki natka ra ai tasbaya nani ai mihta ra bri kan tânka ba, baha wal indian kiamka nani ai tasbaya nani, ai tasbaika pîska nani bara ai ritska nani purara ai raitka nani bri kakaira saki muni yabaia dukiara, baha nani blasi piua wina ai mihta ra brin bara purara iwi kan ba o yus munan ba natka wala ra. Indian kiamka nani ba ai raitka bri kabia naha warkka daukbia ba tilara kaia.

Ulbanka 28

1. Indian kiamka nani ba ai raitka brisa pana tawi yamni munan kaia, kli laki yabaia natka sip kabia ba wal o baku daukaia sip apia kabia taim, mana aibapanka kasak kum, taiban lâka âpu bara dîa praiska ba kat, baha lika ai tasbaya nani, ai tasbaika pîska nani bara ai ritska nani blasi piua wina ai mihta ra brin, hilpka brin o yus muni banhwan ba natka wala ra bara ai mihta dakban ba, upla wala brin, dawanka takan, yus munan o sauhkan ba pri natka ra ai brinka apia kan ba wal, kaina manis sin maisa pakras kira.
2. Indian kiamka nani ai brinka bri ba lukanka wina pri pali lâ daukan kaka lika natka wala ra, mana aibapanka ba lika yaban kabia tasba nani wal, tasba pîska nani bara ritska nani sim praiska ba kat, sim yahpika bara lâ dîa wi ba tânka kat, lalah ni aibapanka kum wal o aibapanka sâtka wala kum wal.

Ulbanka 29

1. Indian kiamka nani ba ai raitka brisa ai kaina kir kutbanka pliska ba pain bri kaia bara kaina kahbaia sin, bara sim baku ai tasbaya nani o tasba pîska nani bara ritska nani ba, bara Gabamint nani lika indian kiamka nani ra tâ baikanka yabaia programka nani bapaia bara daukaia sa, baha wal baha main kaikanka bara kaina kahbanka ba pain daukaia dukiara, saura kulkanka kumi sin âpu kira.
2. Gabamint nani ba natka kasakkira nani alki daukbia bara baha wal aman kaikaia indian kiamka nani tasbaya nani o tasbaika pîska nani ra trabil yabi dukia sâtka nani kahbi briaia bara baha kat sauhki tikaia apia dukiara, witin nani pri pali ai lukanka mangras kaka, bara kaina manis wina sin maisa pakras kaka.
3. Baku sin Gabamint nani ba natka kasakkira nani alki daukbia bara baha wal aman kaikaia, dîa prais nitka bâra ba kat, aitani kat wats takanka, pain bri kaia bara kli rawaia programka nani daukan kabia, baha dukia saura nani bui dîa prais kat indian kiamka nani wîna tara yamnika ra trabil yaban ba sut purara, bara programka nani ba lika tawanka nani silp paski muni alki daukan kabia.

Ulbanka 30

1. Indian kiamka nani tasbaya ra o tasbaika pîska nani ra “militar” warkka nani daukan kabia apia. Sip sa daukaia, ban kra upla nani purara trabil kum balaia sip sa kaka lika o indian kiamka nani ai brinka bri ba wal pri pali daukbia win kaka, o naha nani bui baku makaban sa kaka.
2. Gabamint nani ba indian kiamka nani ai brinka bri ba wal aisi kaikanka kasakkira nani daukbia, natka aihwa nani wal bara kau pali lika ai tâ brabrira aslika nani bâk, baha lika ai tasbaya nani o ai tasbaika pîska nani yus muni “militar” warkka nani daukaia kainara.

Ulbanka 31

1. Indian kiamka nani ba ai raitka brisa ai iwanka natka prapatika ba, blasi piua wina ai sinska lâka nani bri ba, blasi piua wina ai iwanka marikanka nani, ai sinska tihu marikanka nani, diara daukaia sinska nani bara ai iwanka natka aihwa nani sut ba ban bri kaia, yaka tiwaia apia, kaina kahbaia bara yaka pâwaia sin, baha tilara sin dingki ai uplika diara lan nani bara ai masraka baku bri ba, saumuk mâ nani, sîka nani, daiwan bara inma nani dîa hilpka bri ba kakaira kaia ba, wan almukka nani wina sturi aisi aula sinska nani ba, ulbanka sâtka nani, diara paskaia patrangka nani, pulanka tara bara piua wihka wina puli aula dukia nani ba, wan nakra ni kaiki tânka pliki saki dukia nani sut sin. Sim baku ai raitka bri banhwisa iwanka natka prapati baku bri ba bara sinska lâka ai dukia aihwa baku kulki ba sut ban bri kaia, lâ kat yus munaia, kaina kahbaia bara yaka pâwaia, baku sin pura praki blasi piua wina sins tânka

nani bri ba, bara mani nani luan wina ai iwanka natka marikanka nani sut.

2. Indian kiamka nani aikuki asla, Gabamint nani ba natka yamnikira nani bapbia, bara baku lika naha raitka nani na ra kulkanka yabia bara kaina kahbia sin.

Ulbanka 32

1. Indian kiamka nani ba ai raitka brisa wark daukaia natka nani bara kau nit dukia nani ba pliki bapaia bara paskaia, baha wal ai tasbaya nani, ai tasbaika pîska nani bara ritska nani ba yaka pâwaia o yus munaia.
2. Gabamint nani ba tânka pliki kaikanka nani daukbia bara lukanka yamni brih ki asla wark taki banhbia indian kiamka wilinkira banhwi ba aikuki, baha lika silp ai aslika nani paski bri ba bâk, baha wal pri pali ai lukanka bri ba alkaia dukiara bara sin maisa pakan kaia ani proyektoka bri balaia kainara, baha bui ai tasbaya nani, ai tasbaika pîska nani bara ritska wala nani dukiara kabia ba, kau pali lika main ritska nani, ai laya nani o sâtka wala nani nahki yaka pâwaia, nahki yus munaia bara hilpka sakaia ba sin.
3. Gabamint nani ba natka kasakkira nani bapi banhbia baha warkka nani mana lâ natka bara dîa praiska ba kat yabaia dukiara, bara natka yamni nani sin bapi banhbia baha wina trabil munanka nani takbia ba uya tara apia kabia dukiara, baha tânka sika wan kaina kir kutbanka, lalah bisniska, upla baku, iwanka natka o spirit tani ra takaia sip ba.

Ulbanka 33

1. Indian kiamka nani ba ai raitka brisa witin nani dîa sât uplika o ani kiamka ba silp param marikaia, ai iwanka natka nani bara blasi piua wina nahki ba tânka kat. Baha wal lika wiras indian uplika nani ba ai raitka âpu sa ani Gabamintka nani bilara iwi ba lâ kat uplika takaia adar âpu sa.
2. Indian kiamka nani ba ai raitka brisa ai tasbaika tilara ai aslika nani nahki ai playa nani bri kaia dukiara ai brinka ba mangkaia, baha lika silp ai daukanka natka nani wal.

Ulbanka 34

Indian kiamka nani ba ai raitka brisa silp ai aslika bapanka nani ba sakaia, yaka pâwaia bara ban alki bri kaia, bara baku sin silp ai natka nani, spirit tani ra ai lukanka nani, blasi piua wina ai daukanka nani bri ba, nahki daukaia tânka nani bara praptis munaia ba sin, bamna bâra kabia taim, lâ tânka kat natka bara daukanka nani ba, baha sut lika tasba aiska bilara upla nani raitka nahki daukaia lâka nani bapan ba natka kat.

Ulbanka 35

Indian kiamka nani ba ai raitka brisa upla nani ai tawanka nani ra dfa warkka daukaia bri ba laka nani bapaia.

Ulbanka 36

1. Indian kiamka nani ba, kau pali kuntri nani wal ai piarkika brih baiki sakan ba, ai raitka brisa pana pana aisanka nani ba yaka tara takaia, baku sin aikuki ai tanka brinka bara pana pana hilpka laka ba, baha tilara dingki spirit tani ra wark nani daukanka ba, iwanka natka, pulitik, lalah bisniska bara upla baku tanka ba, silp ai memberka nani aikuki, baku sin upla kiamka wala nani wal tasba piarkika nani bak.
2. Gabamint nani ba, indian kiamka nani aikuki aisi kaiki bara ta baikanka wal, natka kasakkira nani bapi banhbia, naha raitka na pain pali yaka alki daukaia dukiara bara kulkanka yabaia sin.

Ulbanka 37

1. Indian kiamka nani ba ai raitka brisa triti laka nani ba, aisi au takan dukia nani bara aisi kaikanka yamnikira nani Gabamint nani aikuki o ai ninara aula ba wal daukbia ba, kulkanka yaban kabia, pain laki kaiki bara sin daukan kabia, bara Gabamint nani bui baha triti laka nani, aisi au takan dukia nani bara aisi kaikanka yamnikira wala nani ba bila walbia bara rispik sin muni banhbia.
2. Naha Laka Ulbi Sakanka ra mangkan na wina kumi sin tanka luki sakaia apia sa indian kiamka nani pat triti laka nani, aisi au takan dukia nani bara aisi kaikanka yamnikira wala nani dauki ai raitka laka nani bri ba ra kulkanka yabras o tikuya baku ai dara walaia.

Ulbanka 38

Gabamint nani ba, indian kiamka nani aikuki aisi kaiki bara ta baikanka wal, natka aihwakira nani bapi banhbia, baha tilara dingki la bisniska nani, naha Laka Ulbi Sakanka bapanka nani alkaia dukiara.

Ulbanka 39

Indian kiamka nani ba ai raitka brisa Gabamint nani bui bara kuntri nani ta baikanka wal lalah tani ra bara sinska laka sin yabia, naha Laka Ulbi Sakanka marikanka nani ra ai raitka nani mangkan ba yaban kabia dukiara.

Ulbanka 40

Indian kiamka nani ba ai raitka brisa dfa la ba kat bara kasakkira natka nani ba yaban kaia Gabamint nani o pliska wala nani aikuki pana pana ai tanka briras dukia nani ba wapnika mangkaia dukiara, bara naha tanka nani yamni apia ba dukiara istikira lukanka kum sakan kaia, baku sin wina kat o dakni ra ai raitka

nani bri ba ra latwan yaban kaka, yamni munanka kum kasak yaban kaia. Baha luki sakanka nani ra kasak pali dara wala kaia sa indian kiamka nani wilinkira iwanka natka nani ba, blasi piua wina ai daukanka nani bri ba, kulkanka lâka nani bara lâ daukaia natka nani ba sin, bara sim baku kuntri nani tilara upla nani raitka lâka nani ba.

Ulbanka 41

Kuntri nani Asla Takanka ai natka bri tilara dakni nani bara sinskira warkka dauki aslika nani ba bara baku sin gabamint nani aikuki dakni wala nani bâra ba, alsut ai hilpka dingkbia naha Lâka Ulbi Sakanka ra bapan dukia nani na aiska pali daukan kabia dukiara aipaswanka nani dauki, diara wala nani daukaia sip ba tilara, lalah tâ baikanka bara wark daukaia sinska lâka yabi. Indian kiamka nani ba yaka tilara dimbia dukiara natka nani bapi banhbia, baha lika witin nani silp ai bisniska tânka ba kat.

Ulbanka 42

Kuntri nani Asla Takanka ba, baha tilara sin dingki Indian Tânka Kakaira nani Piu Bani ai Asla Takanka ban bri ba, bara tawan bîla kat nahmuna tânka laki kakaira aslika nani, bara sim baku Gabamint nani kira, naha Lâka Ulbi Sakanka na yaka rispik munbia bara aiska sin munku daukan kabia, bara naha Lâka Ulbi Sakanka na sin kasak kabia dukiara pura kaiki banhbia.

Ulbanka 43

Naha Lâka Ulbi Sakanka ra raitka nani kulkanka yabi na lika lâ sirpi nani baku kulkisa tasba aiska ra indian kiamka nani ba raya ban iwi kabia, kulkanka bara yamnika sin bri banhbia dukiara.

Ulbanka 44

Naha Lâka Ulbi Sakanka ra upla raitka bara pri lâka nani ra kulkanka yabi ba sut lika upla sut dukia sa: indian waitnika nani bara mairka nani sin.

Ulbanka 45

Naha Lâka Ulbi Sakanka ra mangkan na bui wiras bara bahki kulkanka baku sin yabras lika apia sa indian kiamka nani naha piua ra ai raitka nani bri ba, apia kaka naika piua ra briaia sip kabia ba.

Ulbanka 46

1. Naha Lâka Ulbi Sakanka ra marikan na wina kumi sin tânka brin kaia apia sa Gabamint kum ra, tawan, dakni o upla kum ra kra raitka yabisa, baha lika Kuntri nani Asla Takanka ai Ulbanka Tara daukan ba mapara wark kum daukaia, apia kaka tânka bribia adar yabisa o daukbia wisa mapara warkka kum, baha wal sauhkaia o kulkanka yabras baku kaia, aiska o pîs kum baman, Gabamint kum ai tasbaya aiska bara asla bri ba pri lâka bara baha purara ai karnika aiska bri ba sauhkaia baku natka ra.

2. Naha Lâka Ulbi Sakanka ra raitka nani daukbia wisi mangkan na tilara, upla sut upla baku ai raitka bara pri lâka bri ba sin rispik munan kabia. Naha Lâka Ulbi Sakanka ra raitka nani bapan ba daukaia lika lâ bui dâ praiska kat daukbia win ba kat ai karnika bri kabia bara kuntri nani tilara upla raitka dukiara dâ pali daukaia bri ba wapnika mangkanka wal. Baha lâka nani sip daukras baku kulki ba lika saura baku kulkbia apia bara nitka bri nani ba baman kaikbia, kulkanka bara rispik lâka aitani kat yabia dukiara, upla wala nani raitka bara prika lâka ba bara upla daknika tawan karnika wal ai nitka nani kau tara bara wapnika mangkaia dukiara.
3. Naha Lâka Ulbi Sakanka ra tânka nani mangkan na lika luki sakan kabia kasakka lâka bapanka nani wal asla, baku sin tawan karnika lâka, upla nani raitka rispik munanka, upla sut ba sim baku kulkanka yabi, saura kulkanka yabras tânka, upla nani dukiara wark yamni daukanka bara yamni lukanka kat.